

Edizioni

- letto 503 volte

Ménard

I.

Bone Amour, cruel maniae,
ce m'est vis,
prendés de moi et grief paie,
quant falis
m'est si tost vos briés respis!
or ne sai quel part je traie,
car des maus dont fui garis
mi renovele la plaie.
Or sui tous fis
que s'ainc traïs mal pour vous c'ore atent pis!

II.

Hors de vo dangier quidoie
estre partis:
pau set bien qui mal n'assaie!
Or sui repris:
s'ere batus et laidis,
com clers fuitis ki s'esvaie,
car si sui de mal apris
c'adés quic que biens m'eschaie
plus envis
que s'eüssse esté sovent conjoïs.

III.

Cil qui guerredons delaie
moert tous vis.
En grant cruaute s'entaie
cuers gentis
ki fait samblant ne dolc ris
k'il retolle ne retraiet:
ç'afiert a lanier faintis
cui on abeche et adiae,
fameïs,
pour estre plus aigre et volenteïs.

IV.

Mais n'est mestiers c'on m'atraie
par tels dis,
car ne sui muiers de haie
ne souassis,
ains sui soveniers tos dis
d'amer dame cointe et jaie
a gent cors et a cler vis.
Plus droit que uns ars ne traie
m'a assis
.i. regart d'amours el cuer de mon pis.

V.

Et se si fais cols m'esmaie
et tient pensis,
qu'em puis s'or ne me rapaie?
mar eslis
orguel et valour et pris
que ne soeffre que bien aie.
Mais contre orguel sui garnis:
de tant con gentiex cuers fraie
ses abis,
si croist pitiés et doucours et mercis.

VI.

Chante, Rasset, con jolis,
di maistre Guillaume c'aie
cuer espris
de joie d'amours que pert Gievencis.

- letto 341 volte